

# Je'ej ti tyo'yú'xaca' a'íjna i San Judas

## Judas pu hua'tyojtye'

<sup>1</sup>Nyáaj i Judas, i nyaj tyí'huire' a'íjna jimi i Jesús ti ajta Círístu' pué'een, nyáaj nu juutzájra' pué'een a'íjci i Santiago, yanuj já'muatyojtye' mua'ajmaj i Dios ti jamuaatajé a'íjna i tyaj jajvástara', a'íi pu ja'muacha'ij a'íjna jimi i Círístu'. <sup>2</sup>Siata'aj ja'ancuriá'an i Dios ti jin jamua'ancu'vaxij, siata'aj tyámua' eenye'en i jutzájta', sij sij huóoxie've'en séej sijta séej.

## A'íimaj i maj hue'tzij jin tyihuá'mua'tyej

(2 Pedro 2:1-17)

<sup>3</sup>Nye'ihuámua' mu nyaj já'muaxie've', a'yaa nu jéehua tyá'xie've' nyaj tyajamuaatayú'se'en a'íjna jitze ma'can i Dios ti jin tajapuá huatányuusij, ajta ijíj ca'nyíjra'aj pu nyatá'caa nyej nyij tyajamuaatayú'se'en, nyajta jamuaatáhuavii sij sij a'íjna jin huatyéno'se'en i nyúucarij i sij jitzán tyá'tzaahuatye' i Dios ti mua'ajmaj jimi jaatyájtoo mu sij tyámua' een. <sup>4</sup>Ji'nye séecan mu avíitzij jin antyóonaxcaca' ja'mua jamuán, a'íi mu a'íin pué'een i maj quee tyámua' tyá'tzaahuatye'. A'íi mu je'ej pua'aj tyityetyúucha'ij, majta hue'tzij jin je'ej pua'aj tyá'xaj i Dios, a'yaa mu mij a'íjna jin tyá'hue'taj i tavástara', a'íjma pul'ij a'yan tyí'ci'tyij mej mij a'yan tyajpuéetzij muá'ra'nyij je'ej ti ará'tyeej tyé'yu'si'huaca'aj i yu'xarij jitze.

<sup>5</sup>Tyij sijta seríj mua'aj jamua'reej, a'yaa nu tyá'xie've' sij jo'támua'reej tí'ij i tavástara' hui'rájtoj a'ájna a Egipto a'íjma i jutyéityeristyamua', aj pul'ij hua'antypua'rij a'íimaj i maj quee ja'antzaahuaj. <sup>6</sup>Majta a'íimaj i maj tajapuá tyí'huire' i maj quee ja'rá'astej je'ej maj tyí'tíj jin tyitye'entyúumua'reeriaca'aj, sulu a'yaa mu tyaatáxaahuataca' i maj jin tyityetyú'uuca'aj, Dios pu hue'tyáanaj jo'tíj jo'tíca', ta'aj ij puéjtzij huo'tá'an a'ájna xicáara' jitze tí'ij néijmi'caa á'xijtye'en. <sup>7</sup>A'yájna tí'ij tye'mej a'íjma jimi i maj tajapuá tyí'huire', a'yaa pu ajta tyihuó'ruuj a'íimaj i maj Sodoma já'chajca'aj, majta a Gomorra, majta séecan i maj

avéjri' huacháatima'caa, i maj majta huóoxana'cirej tyi'tíj jime' ti quee xá'pui'. A'íj mu jin jaapuéjtzitariaca' a'íjna jime' i tiéj jime' tiquee a'náj já'mui'nyij, a'íj pu'ij jitze ámiteere' tyej tyij jáamua'reej.

<sup>8</sup>Majta a'íimaj i maj avítzij jin je'ej pua'aj ricij je'ej ti tyihua'ránajchi, a'íi mu majta je'ej pua'aj jáaruuj i jutyévij, majta jaatyáxaahuataca' i tavástará' ti jin antyúumua'reej, majta je'ej pua'aj tyihuá'xaj a'íimaj i maj tajapuá já'sejre', i maj va'cán jin tyityetyu'uj. <sup>9</sup>Ajta a'íjna i Miguel i ti va'cán jin tyi'tyéjvee u tajapuá, ti'ij huatyéenyosej i tyiyáaru' jimi, a'íjna jime' i tyévira' i Moisés, capu ahuóoca'an ti je'ej pua'aj tyaatájeevej a'íjci i tyiyáaru', sulu a'yaa pu tyaaté'exaa tijin: “Che' i tavástará' muajtyá'xi'in.” <sup>10</sup>Majta a'íimaj i tyétyacaa a'yaa mu je'ej pua'aj tyá'xaj i maj quee jamua'tyej, ajta je'ej ti tyi'tíj tyihuá'miteeraste', a'yaa mu tyéejtyoovej mati'íj i ya'muáatye'e i maj quee tyojó'itej, a'íj mu mij jin jujíimua'aj óopua'ritye'en.

<sup>11</sup>Dios pu puéjtzij huo'tá'sij a'íimaj. Ji'nye a'yaa mu cha'taj mana'aj ricij ti'ij a'íjna i Caín. Majta a'íjna jin ajtacíj mej túmii huamué'tin, a'yájna ti'ij huaríj a'íjna i Balaam, ajta a'íjna i Coré, a'íj mu mij jin cui'nyij. <sup>12</sup>A'íi mu mij tyévi'si' séejre' jo'siaj jóosi'rii siaj sij néijmi'i tyú'cua'nyij a'íjci jime' siaj juxie've', a'íi mu mij majta tyi'cua'caj ja'mua jamuán, majta jutyamua've'ej ya'caa, majta quee tyi'tíj ja'astej. A'íi mu jujíimua'aj mana'aj jucha'ij. A'yaa mu een ti'ij jéetirij maj quee jitzá'n vijvi'yej, sulu áacaj pu'uj jáatisij. A'yaa mu majta een ti'ij ciyéj tiquee taca', ti'ijta xíjcata' putyí'rijcaj, mu'ríj hua'puaj huácuij majta éejcutyijhuaca' jo'maj ja'riá'vaaca'aj. <sup>13</sup>A'yaa mu een ti'ij i jájtyij ti atyúuta'huaj ca'nyíin jime', ajta jitzá'n cuémuxa'aj ájnyinyij ti a'ín pué'een je'ej maj tyi'tíj jin tyévi'si' huaríj. A'yaa mu majta een ti'ij xú'ra'vej i maj jó'jujhua'an jo'tij jo'tíca', a'yaa pu'ij tyihuá'ci'tyij maj a'áa jo'tyá'ítzeere'en jo'tij jéehua huápu'íj jo'tíca'.

<sup>14</sup>Ajta i Enoc, a'íjna i ti aráahua'puaj pué'een i maj Adán jitze eeráma'can, a'íi pu a'yan tyihuo'té'exaaaj i tyeítýee i Dios jitze ma'can tijin: “Nyáaj nu jaaséj i tavástará' ti aje'cáma'ca'aj hua' jamuán i maj mui'ij i maj tajapuá tyi'huiire', <sup>15</sup>a'íj pu jin yava'cányesij ti'ij huo'xíjtye'en néijmi'caa i maj je'ej pua'aj huaríj, ajta a'íjna jin huá'xíjtye'en i maj jéehua huápu'íj je'ej pua'aj tyi'xajtaca'aj i Dios jimi.” <sup>16</sup>A'íi mu néijmi'i jin junyuuste' i maj nyinyu'cacuj, majta a'yan tyá'huo je'ej ti tyi'tíj a'íijma jimi tyúuxie've'. Jéehua mu óotzaahuatye' a'íjna jime' je'ej maj jujíimua'aj tyúuxaj, majta hua'xaahuaj i tyeítýee, mej mij tyi'tíj jin huo'tyámue'tin.

**Ca'nyíjra'aj pu hua'tá'caa a'íjma i maj  
tyá'tzaahuatye' mej mij huatóotyamua've'en**

<sup>17</sup>Siajta mua'aj, nye'ihuáamua' mu nyaj já'muaxie've', siata'aj jo'támua'reej je'ej maj tyu'taxájtaca' a'íimaj i tavástara' ti ajta Círíistu' pué'een ti hua'antyíhuoj, <sup>18</sup>a'yaa mu tyu'taxájtaca' tíjin: “A'ájna tí'ij arí néijmí'i tye'entyipuá'risime'en, a'íi mu huataséjre'sij i maj tyihuá'xaahuaj, i maj a'yan tyi'tyucha'íj muá'ju'un je'ej ti a'íjma tya'ráanajchi, a'íjna jime' i ti je'ej pua'aj een.” <sup>19</sup>A'íi mu a'íin pué'een i maj ca'nyíjra'aj hua'tá'caa i tye'ítyee mej mij jé'ta' huáciinyej, a'íi mu jujíimua'aj jájtyo je'ej maj tyi'tíj jin ricij, majta quee jitzán aróoca'nyej i júuricama'ra' i Dios.

<sup>20</sup>Siajta mua'aj, nye'ihuáamua' mu nyaj já'muaxie've', siata'aj tyámua' eenye' i siaj jitzán tyá'tzaahuatye'. Siata'aj jitzán arooca'nyáaj i júuricama'ra' i Dios huatyényuunyij. <sup>21</sup>Siajta tyámua' tyityahuóocha'íin a'íjna jime' i Dios ti jin já'muaxie've', siaj sij jajchó've'ej a'náj ti xicáara' jitze uvé'nyesij i tavástara' Jesús ti ajta Círíistu' pué'een, a'íjna i ti jin tá'cu'vej a'íj pu jin taatá'sij tyej tyij júurij huatyá'itzeere'en jusén jime'.

<sup>22</sup>Siata'aj hua'ancu'vajxi'ín i maj quee tyámua' tyá'tzaahuatye'. <sup>23</sup>Siata'aj séecan japua huatányuunyij mej mij quee huatyáaanyij, siajta séecan áancu'vaxi'ín, siajta tyámua' tyityahuóocha'íin a'íjma jimi, ji'nye jéehua mu huápu'íj xána'visi' huasé'rin a'íjna jime' i maj ootyá'itzee i Dios jimi.

**I nyúucarij ti uve'tyáatican jin tyé'tyojtzi're' i Dios**

<sup>24</sup>Ajta a'íjna i ti néijmí'i putyí'uurej ti tyámua' tyajamuáacha'íin siaj sij quee tyi'tíj jin ootyá'itzeere'en, a'íi pu jamuaataséjrataj jujimí jo'tíj naa jo'éen, siata'aj sij huatóotyamua've'en, <sup>25</sup>ajta i Dios ti síij na'aj pué'een, i ti tajapuá huatanyúj, tyiche' a'íj tyu'tatyójtzi're'en, ji'nye a'íi pu va'cán jin tyi'tyéjvee, ajta néijmí'i jin tyí'ijta, a'íjna jitze ma'can je'ej ti huaríj i tavástara' Jesús ti ajta Círíistu' pué'een, tí'ij na'aj jájcuaj ímuáj, ajta íjíj, ajta jusén jime'. Che' a'yan tyá'ra'nyij.